

張文襄公奏議

張文襄公全集卷十一

奏議十一

籌議闖姓利害暫請弛禁摺

光緒十一年四月二十日

竊於光緒十年九月三十日承准軍機大臣字寄九月初八日奉 上諭翰林院代遞檢討潘仕釗奏變通挽回鉅款一摺廣東闖姓賭局疊經申禁茲據該檢討奏稱澳門開設闖姓公司利歸他族現在海防需餉請飭體察情形能否將澳門闖姓嚴禁抑或暫將省城闖姓弛禁等語著張之洞倪文蔚妥議具奏至所稱副將彭玉夥同奸民何貴等私收闖姓各節並著確切查明究辦

等因欽此又於十一月十七日承准軍機大臣字寄十月二十三日奉上諭御史何崇光奏稱省城開設闖姓廠視澳門開廠流弊尤甚請飭申明厲禁等語著張之洞倪文蔚歸入潘仕釗前奏熟權利害一併妥議具奏另片奏請將闖姓賭匪陳恆等嚴拏懲治並著查明究辦等因欽此又於十一月二十九日承准軍機大臣字寄十一月初六日奉上諭據翰林院侍讀梁耀樞順天府府丞楊頤奏闖姓詭謀復開縷陳科場舞弊商賈受累奸民縱恣賭匪橫行四害請旨嚴禁並聲明澳門僻居一隅視從前闖姓已減十之六七等語闖姓弊端甚

多本應嚴申禁令惟須一律禁止不使利歸他族方爲上策若如該侍讀等所奏不特省城未便弛禁卽澳門亦可逐漸禁絕應如何設法辦理之處著張之洞倪文蔚悉心籌商妥議具奏等因欽此臣等博訪周咨熟權利害於十一月二十七日電奏請旨旋准總理衙門電開十一月二十九日奉旨彭玉麟等電稱粵省闡姓請暫弛禁濟餉等語著依議行仍隨時體察如察有流弊卽行奏停欽此欽遵查照先後咨行在案伏查廣東闡姓一事自前撫臣張兆棟奏請申禁以來遂爲澳門利藪於是議塞漏卮者率皆以此爲言並不因籌餉而起

海防既亟籌澳防籌軍餉者言之尤切臣玉麟上年五月條陳廣東事宜疏內本有闡姓弛禁一條臣之洞到任之初曾經錄稿相示自八月奉妥防澳門之電旨九月奉能否弛禁之寄諭當經分別會飭司道府縣各官妥籌詳議旋據布政使龔易圖按察使沈鎔經鹽運使瑞璋督糧道益齡會同善後局轉據廣州府知府蕭韶署南海縣知縣危德連署番禺縣知縣侯甲瀛詳稱自同治三年至同治十年歷經地方官查拏闡姓罰認軍需疊次共罰繳銀四十餘萬兩均經奏明在案光緒元年申禁以後奸民私於澳門設局輸資葡人澳酋作護

官力遂窮藉此巨資購船置礮近且接濟法虜窺伺省垣澳爲粵患中外共知爲叢驅爵有名無實藉寇資盜有損無益現經紳商具呈如蒙弛禁情願認捐巨餉此時餉源無出亦可藉紓目前之急卽據誠信堂商人張榮貴敬忠堂商人楊世勳等呈請合辦以六年爲限共捐洋銀四百四十萬元五箇月內先繳一百五十萬元其餘二百九十萬元按年分繳當經邀集省城大紳暨各書院山長前赴明倫堂團捐局公同面議再三諮訪僉謂可行並據署水師提督方耀署陸路提督鄭紹忠咨呈稱防務甚急絕澳之援增我之餉無逾於此應請

速辦等情會詳請奏前來臣等會查潘仕釗所奏言弛  
禁便何崇光梁耀樞楊頤所奏言弛禁不便兩說判然  
若水火之不相入恭繹九月初八日諭旨則曰熟權利  
害十一月二十九日諭旨則曰不使利歸他族宸謨二  
語精要無遺實爲此事之權衡羣言之斷制謹先言資  
敵之害葡與法通確有明證上年七月二十一日之電  
旨十二月初二日會紀澤輪墜之電信香山縣丞之密  
稟以及港澳各項探訪員紳洋商之密報皆謂法將借  
地泊船屯兵由五門窺省許以法向租澳地酬葡去秋  
開戰後法領事薩來思之子卽潛寓澳各屬教民多逃

赴澳以至代招游匪運助火食鑿鑿可稽海警方殷之時接濟苦於不能斷口岸苦於不勝防豈更可豐其羽毛資其巢窟害一也或曰中法兵衅有時而弭葡雖助法何妨則請言養寇之害粵省大患首在香港澳門一東一西塞我門戶百事不得自由藪奸撓法伏戎乘虛港猶隔洋澳則接壤所幸澳尙貧弱商業蕭疏近年茶商頗爲減色自開姓移館以後游民雲集賈販爭趨各項公司日增月盛澳民增一商澳酋增一餉澳酋歲收關稅數十萬他稅亦數十萬澳商歲增數百萬於是增兵額加礮臺以二十萬向外洋租置戰艦聲勢日張



彼商務不足自存我驅華商租稅以富之坐使肘腋之間增一強鄰廣州永無安枕之日害二也或曰葡雖富強亦無能爲則請言自耗之害財物止有此數枝強則幹弱外溢則內虛三十年來廣州商利半移香港此已無從追論澳門陸路相接逋逃尤便闖姓開先公司踵後洋界日富省會日貧損境內有釐有稅安分守法之良商而益界外法令不及徵稅不加之奸富害三也或曰何不如言者所云查分館責兵役以禁之則請更言妨政之害自明文申禁以後大吏避開闖姓之名而又欲攘開闖姓之利於是造爲截緝之說委派員紳各路

搜截爪牙四出白晝橫行分館之家得規者免佛山爲  
近郊大鎮偵知其館最旺利最豐委紳陳桂士作綫掩  
捕官得罰款七萬兵役地棍所得可想而知民間大擾  
遂被言官參奏上年七月初六日欽奉寄諭飭臣之洞  
查辦在案數年來肇慶韶州清遠之分廠如故官商之  
投買如故紳棍衙蠹之陋規如故上造子虛烏有之言  
以欺朝廷下行告緡沒入之法以罔百姓名實相違進  
退無據成何政體害四也或曰言者所陳尙有責巡船  
禁渡船之法則請言擾民之害有羶則蟻往有市則買  
來澳館大開利徒安阻夫賣闖姓者人給數葉之卷買

閩姓者人挾數寸之紙縣縣有之日日有之必將於各  
屬通澳水陸各路歧塗支港設巡船數百號駐巡役數  
千人凡往來之商旅良賤解衣倒篋人人搜檢終年無  
休王道蕩平之世安有如此政體哉即使爲之而巡邏  
之賣放赴澳洋人之夾帶北自京城上海南至暹羅呂  
宋新嘉坡中外輪船之遞送果有何術可以禁絕查澳  
館初開之年葡酋歲責稅餉十餘萬上年遞增至三十  
餘萬必其利厚然後稅多若謂近年已減十之六七何  
以澳商認稅爭充轉加三倍然則禁令之行與不行投  
買之減與不減亦略可知矣禁則無矣擾則有之害五

也有此五害卽無捐餉助軍之舉亦宜解此虛懸之文  
網以塞切膚之漏卮矣且卽以籌餉而論去秋以來強  
敵在門連營在野外援臺閩滇桂內防廣潮廉瓊軍械  
工程礮臺河道繁費萬端京餉已留借款已罄釐稅不  
足勸捐不應自交冬令事益急而餉益枯始則停工繼  
則欠餉臣等與司道將領外費拊循內困羅掘日夜憂  
焦其時歲暮天寒各營將士枕戈待旦若非幸蒙聖恩  
得此巨款百餘萬聊濟目前粵事殆不堪設想夫籌餉  
事體何一不取之於民抽收捐集銖黍皆艱卽每年數  
十萬亦何容易軍餉多一來源卽民間少一搜括此則

贈軍實之與恤民生尤顯然相爲表裏者也至何崇光等各疏大指略同命意何嘗不美陳義何嘗不高然但論閩姓之當禁而不考歷年之未嘗禁且不思禁省不禁澳之不如不禁諸臣皆爲粵人而並不考粵事殆非核實平心之論乎此舉自奉旨飭議後臣等卽懸牌揭示禁絕官吏使費與受同科責令該商將向來各衙門規費數十萬盡數歸公加入正款於是正項由三百萬加認一百四十萬似已塞盡利孔周諮博訪官紳士庶眾論攸同若謂此數百千文武紳民人人皆爲賭匪所役語語皆懷關說之私斷無此理若謂商賈受累奸徒

得規則省澳有何區別屬禁愈嚴索規愈暴陳桂士以  
得規參所得者省禁澳開之規也彭玉亦以得規參所  
得者亦省禁澳開之規也此皆諸臣原奏所言者也至  
科場弊端自宜嚴杜特是作弊者在省與在澳同粵省  
向有匪徒名爲闌棍扛姓包槍招搖射利歷年有之惟  
在學政考官明於校閱監臨提調嚴於闌防自無弊竇  
查粵中司文衡者物議紛紜適在光緒元年旣禁闌姓  
之後潘仕釗疏內已詳不待煩言而解現經臣之洞臣  
文蔚等嚴章明示凡關涉學政考官及各衙門人等不  
准投買賣成該商稽察如投買之人與得標之人可疑

者卽行舉發查究將所得之彩充公該商隱匿不舉卽封其館不准開設使棍徒無從獲利其弊自絕臣等學術才性素近迂拘若僅恃此爲防海之良圖理財之上策臣等雖陋尙不至此然當此安攘交亟之際而有權宜弭患之方旣已詳考博議利害較然斷不敢飾空論以欺聖明務虛名而滋實禍所有聞姓暫行弛禁一節現已飭行司局恪遵十一月二十九日電旨妥爲辦理以後仍隨時體察如有流弊卽行奏請停止抑臣等更有進者此舉原屬權宜不得不然終必須禁絕根株方爲常經至計以後粵防自必日求強固惟有俟我兵力

漸強船礮足備先行移檄澳酋約彼不得梗令底匪違  
者絕其通商然後省澳一律通禁護符既餒令下風行  
庶乎坐言起行確有實際此則臣等所竭力圖之而寤  
寐不敢或忘者也至副將彭玉澳商陳恆何貴等在澳  
設廠收規各情由臣之洞臣文蔚另行查明覆奏再何  
崇光等摺係交臣之洞臣文蔚議奏因此議原係司道  
具詳紳商具稟經臣玉麟與督臣撫臣公同飭議批准  
先於上年十一月二十七日會銜電奏是以此次摺奏  
仍會同列銜合併聲明

旨知道了欽此



請派瑞璋兼辦洋務片

光緒十一年四月二十日

再粵省爲南洋首衝港澳密邇中外交涉之事視他省爲繁照會函牘無日無之粵省向無關道專辦洋務光緒七年前督臣張樹聲前撫臣裕寬奏請將廣州一口派糧道專管尋常洋務事件由道轉申奉旨該衙門知道欽此欽遵並經總理衙門照會各國公使轉行領事遵照在案無如各國領事狃於故常事無鉅細並不經由糧道仍係逕達督署動輒來署索見瀆擾不休自光緒九年藩司龔易圖經總理衙門暨前督臣張樹聲奏派辦理汕頭沙面兩案因是遇有各項緊要洋務每飭

該司與之晤接操縱較爲活便以該司係奉旨派辦品  
秩較崇各國洋人尙肯與之交接現在龔易圖調任湖  
南卽將卸事離粵除經手汕頭沙面兩案已經定議外  
現在隨時商辦要件尙多若不另派大員則遇事無人  
可與辯論實多窒礙查兩廣鹽運使瑞璋事理明澈局  
度安詳由總理衙門章京出任關道數年於各國性情  
風尙及各口通商條約均能諳習若令兼辦洋務當可  
斟酌妥協合無仰懇天恩將粵省現在未結洋務各案  
飭派運司瑞璋辦理嗣後遇有洋務要件卽飭該司與  
之面加商酌面牘往來官階體制與藩司相近洋人當

無異詞臣仍當覆加裁酌妥籌辦理其尋常事件仍由糧道會同該司妥辦如蒙俞允應請敕下總理衙門查照龔易圖成案函知各國駐京公使其如何措詞應由總理衙門酌度如此則辦事既有層次辯析可期周詳臣亦可藉收臂指之助於粵省洋務不無裨益再此係因運司瑞璋諸悉洋務是以請旨派辦並非委令運司衙門永遠專辦合併聲明

旨著照所請該衙門知道欽此

續增勇丁并規越援臺各營補陳備案摺

光緒十一年五

月二十五日

竊查上年七月以前布置海疆各營及分遣規越援臺各軍經臣等於十月十二月兩次奏報在案八月以後粵防日形喫重法船退出長門以後多來香港聲言擾粵沙路爲中路之南路地最向外前接蓮華山後通南石頭王孝祺勤軍四營一哨不免單薄因移北岸提督蔡金章所部廣濟軍三營紮沙路迤南以助勤軍北岸專責之署廣州協副將鄧安邦令其選調東莞新安團勇三千名編爲六營官給口糧分紮魚珠前後之蚧岡烏涌等處以爲魚山獅山各礮臺犄角其時水雷俱已徧下令記名總兵劉寶春趕造洋舢板三十隻配水勇

四百五十四名分泊黃埔虎門沙角蒲州一帶巡護水雷又募善於泗水之勇丁一百名令廣西試用知縣張義澍管帶以備攻燬敵船十月間派王孝祺統八營一哨出關援剿所部內有安勇一千五百名係由署陸路提督鄭紹忠營內抽撥因令鄭紹忠添募安勇四百名酌量填補有礮勇三百名係由遊擊黃廷耀營內抽撥因令黃廷耀添募礮勇一百五十名并於黃廷耀紅單船水勇五百名內裁撥一百五十名仍合成礮勇三百名填紮原防勤軍既行沙路太單令蔡金章添募五百名連原部三營副將黃德耀團勇一營以資防守令陽

江鎮總兵黃廷彪於東濬口建造礮臺添募親軍一百名守之嗣接臺灣來電法人將棄臺圖粵臘正之交香港惠州一帶會匪頗多蠢動有句結法匪之謀省城戒嚴尙書臣彭玉麟親駐沙角臣之洞卽擬出省赴黃埔魚珠一帶督勦添募親軍四百名臣文蔚添募親軍五十名正月初旬以後南關被寇龍州危急廉州封口甯甯以下沿江驚擾遊勇士匪乘機肆掠潯梧各郡皆來東省請兵其時省防方急各軍皆有分地設有緩急無可抽調而周家盛廖長明兩軍尙無入桂音信雖經奏調龔繼昌率軍來粵爲期尤遠因令記名總兵李先義

招募廣勝軍二千五百名以備赴急援勦之用自正月  
初卽定議遣吳宏洛一軍渡臺擬移沙路之軍填守長  
洲令記名總兵劉樹元招募湘軍兩營併撥他處原有  
湘軍二營益之填守沙路此粵防本省節次添募之營  
也廣桂滇越諸軍餉械皆由東省轉輸軍情日急解運  
日繁民船旣多稽遲又須待沿江扒船輪轉護送不免  
耽延上年冬間飭督標左營參將蔡其昌酌量龍甯一  
帶灘河情形造轉運船六十號募配水勇五百五十五  
名取其裝運護送合而爲一較可迅速派知府張廣雲  
赴龍州設西轉運局募勇五十名以資防護十二月間

准提督馮子材咨前敵攻勦喫緊防護糧餉需人該軍  
添募收放局勇丁六十名正月初署懷集營守備副將  
龔尙春自請卸任率勇援臺其時吳宏洛正在籌船東  
渡聞臺北淮勇病亡過多粵省新來淮勇尙眾因另派  
龔尙春帶淮勇五百人先到汕頭設法東渡現已據報  
到臺五品卿銜吏部主事唐景崧於宣光撤圍後奏明  
調回桂邊防扼牧馬其時桂軍多潰敵勢蔓延牧馬爲  
歸順鎮安屏蔽地勢可斜出南關之後敵所必爭情形  
緊急因電飭該主事添募二千人俾可獨當一面進規  
太原黃守忠所部先經奏明飭調隨唐景崧助勦旋據



唐景崧報黃守忠率眾一千人到防編爲兩營分紮下  
陳等處此規越援臺節次添募之營也所有前後添募  
各勇應造花名等冊均俟造繳齊全再行彙造送部查  
核據善後海防局營務處各司道會詳請奏前來臣等  
查以上續增水陸各項勇丁均係奉旨停戰撤兵以前  
之事爲省防者尙不甚多大率皆因協助臺越滇桂而  
起不惟出關渡海者固係外援卽屯駐本省者亦多因  
廣軍外調致需增兵填紮故粵餉之累不累於本省而  
累於鄰疆臣等現正體察情形將各路防勇酌量分別  
撤留以節餉需

旨該部知道欽此

補陳保衛教堂情形片

光緒十一年五月二十五日

再上年七月初三日閩江開戰法領事師克勤盤踞省城殊無行意竊思界限不清則軍心疑惑奸細公行內外通連防務無從下手當卽於初四日照會該領事責該國於雞籠馬尾兩次先開兵端令其率同法國商民教士卽行出境該領事包藏禍心不願令教士離粵覆書不允始行相隨而去嗣於七月二十五日准軍機處咨欽奉七月初六日諭旨法國商教一律保衛仰見聖德如天實爲攻心伐謀之上策查粵民强悍好義亦喜

生事平日教民倚恃洋符抗官作惡士民切齒若徒加厲禁必更激成眾怒更無保全之法將又蹈沙面覆轍波及他邦先經與在事諸臣商定一聞戰信立飭地方官出示將法國教堂概行封禁諭以法人開衅擾害地方所有法國教堂物業均應查封備抵此與官物無異不得擅動凡法國教士出境密飭地方官妥爲防護若習教民人敢有通敵接濟者立誅無赦其安分者不准殺害一面優懸賞格若法寇犯境痛加勦除并諭以粵民衛國同仇素深嘉尚惟是誅犯順之法兵奪臨敵之船礮則爲勇士害安分之教民燬封閉之教堂則爲亂

民勇士有賞亂民有刑各不相假其時省內外眾怒洶  
洶傳書集眾意欲盡燬法產攻擊教民見此示後眾情  
稍定復經責成團練紳耆剴切開導通省有司營弁多  
方鎮撫自七月至十月以來據廣州等府各屬稟報查  
封教堂之案二十餘起計教堂并公署行棧九十五所  
什物飭役看管護送出境兩廣法教士五起共十名其  
改裝潛逃者無從悉其名數又欽州有教堂違約置買  
私產一案暫令入官管業綜計各教堂物業間有被閒  
人侵損者尚未大加殘毀亦有教民自行拆毀者惟省  
城賣麻街教堂於十月二十一日因看街兵棚失慎延

燒數間旋即撲滅至於法國商教都無所傷教民積惡者多遁至香港澳門欽州教民多至越南餘則畏罪伏處或移徙他鄉頗有悔教求免者均無傷害廉州府屬潯州墩教民所萃本年正月法船來封北海串誘墩內教民助亂攻廉該教民不從當經飭令該府縣善爲獎撫其各國教堂民間未能分晰偶有生事計所損失尤屬幾微均經官弁隨時彈壓酌量調處息事法領事師克勤徬徨香港深銜粵省之首倡驅遣明懸賞格慙恨萬分因致信孤拔令其攻粵報復所以法船出長門時津滬閩港各電皆言將擾廣東而孤酋意在臺灣未聽

其計此事探訪甚確不知當時情事若領事不行教師  
不去教堂不封則在粵法人早已唯類無遺而教民之  
禍亦不可問現在款局已定按照公法事在開戰以後  
法人斷無責問之理如將來法使妄聽該領事所嗾強  
詞追論伏懇敕下總理衙門嚴加駁斥以杜妄求  
旨該衙門知道欽此

請留蕭韶片

光緒十一年五月二十五日

再廣州府知府蕭韶蒙恩擢授湖北荆宜施道現已委  
員接署俟署任人員到省交替後即當飭令赴鄂查該  
員官聲最好爲通省官場之冠曾經臣之洞年終密疏

臚陳臣文蔚上年露章薦舉各在案竊惟粵省最爲難治吏治亟須整飭久在聖鑒之中由其政繁俗悍華洋錯處事雜言訕非素得人心雖有良法惠政動多扞格該員端潔公明剛柔得中專務力行周悉民隱每當盤錯糾紛之際該員出一言行一令眾情立即帖服相悅以解由其皎然之操愛民之意久爲粵人所信而又久官省垣熟習地方情形以故令行禁止目前籌防籌餉百事艱難水潦爲災賑撫尤急非有得民練事之員實難措手該員行將去粵臣等失此臂助殊切徬徨僚屬紳民咸爲悵惘竊思粵省實缺各道員才猷政術各有

所長特較之該員最爲粵民所感孚尙屬有間可否仰  
懇天恩於廣東各道中與蕭韶對調一缺實於粵省吏  
治民生大有裨益

旨留中欽此

籌議海防要策摺

光緒十一年五月二十五日

竊維自強之本以操權在我爲先以取用不窮爲貴夫  
欲善其事先利其器百工居肆君子致道經之明訓也  
器械不利與空手同不能及遠與短兵同史之良規也  
自法人啟衅以來厯考各處戰事非將帥之不力兵勇  
之不多亦非中國之力不能制勝外洋其不免受制於



敵者實因水師之無人槍礮之不具故臣抵粵以來首以購備軍火爲務分向歐美各洲不惜重金廣求利器遠募洋將以資教練並訪求粵省究心雷械之員弁工匠凡稍有才藝心思者皆令多方試造以冀逐漸擴充開茲風氣往時華軍與洋人角逐每苦不敵近來滇桂出關之師漸得各種後膛快槍已能取勝儻更有陸路車礮地雷等具加以主客之形眾寡之勢勝算實可自操卽臺北諸役人自爲戰尙能遏其內犯如有利械何敵不摧茲雖款局已定而痛定思痛尤宜作臥薪嘗膽之思及今不圖更將何待臣夙夜籌思當時急務首曰

儲人材夫將帥之智略戰士之武勇堂堂中國自有千  
城腹心豈待學步他人別求新法獨至船臺礮械則雖  
一藝之微卽是專門之學有船而無駕駛之人有礮而  
無測放之人有魚雷水雷而無修造演習之人有礮臺  
而不諳築造攻守之法有槍礮隊而不知訓練修理之  
方則有船械與無船械等故戰人較戰具爲尤急查泰  
西各國莫不各有水師陸師學堂粵省曩年設立實學  
館近改名博學館以教繙譯算法因經費未敷規模未  
廣臣擬就博學館基址設水陸學堂一所參考北洋福  
建水師學堂章程慎選生徒延聘外洋教習並令陸續

募到之通曉火器水雷輪機駕駛臺壘工程之洋弁皆  
集其中講習水戰陸戰之法外如繙譯西國兵書測繪  
地圖並電學化學重學氣學光學等項有關於兵事者  
以及製造火藥電綫強水紅毛泥各種技藝均可量能  
因性分門講求並選有志氣肯用心之將弁亦入其中  
博習討論以備將材之用此時儲育之經費無多而異  
日備用之功效甚大以爲宜急籌者一也次曰製器  
械去年各省設防以來所購軍火不下數百萬金而良  
桮不齊且損重費甚至居奇抑勒藉口宣戰停運截留  
種種爲難令人氣沮其運脚保險行用等費扣至四五

成不等仰人鼻息實非長策查外洋所恃以爲戰者四其爭戰於外海者恃鐵艦其水陸攻守兼用者恃快槍巨礮其設守於海口者恃各種水雷鐵艦之製費鉅工遲卽穹甲衝快各船費雖稍減然如所定濟遠之式每艘已需銀六十萬事體重大機算精微未便率爾施工粵廠現雖試造淺水輪船亦爲練習人材漸求造法而於快船巨艦不易蹴幾謹當另籌辦法專疏上陳惟各種槍礮乃水陸所急需查後膛前膛利鈍迥別一不避風雨二迅速三及遠四輕捷五穩便輕捷者克虜伯三千斤之礮其力與英法前膛萬斤者等而簡速靈活過

之穩便者後膛礮可以蔽身入彈不必探身出外裝洗敵彈緊密之際後膛槍可以臥放滾進洋兵笨整彼不能學此前敵將士屢次苦鬪思索而得之者也比年各軍將士漸已曉然後膛之利不復偏執故說是故船利雷猛則省礮臺臺堅礮準則省陸營敵在海口以一臺禦之而有餘及其登岸以十營防之而不足連年各省海防募勇數百營耗費無算良由臺礮俱無可恃不得不多備陸勇以爲平地搏戰之謀然深入野戰所傷已多且勇散多則可憂械久存而不敝故節餉之道自礮臺始礮有臺礮船礮行營礮三種其用各別臺船礮皆

以身長擊遠爲貴船礮非輕則船不能勝惟德之克虜  
伯廠爲宜臺礮略重無妨卽英之亞吾士郎廠亦尙可  
用克虜伯之礮內管外箍皆用純鋼其製較難亞吾士  
郎之礮鋼管外加熟鐵箍其製較易近上海購有製十  
八頓礮之機器用亞吾士郎之內鋼外鐵用克虜伯之  
來福綫後開門各法如使所製能成其重已及三萬斤  
彈遠能至十六里中國各海口礮臺似已足用臣近閱  
大學士左宗棠疏請閩省船政兼鑄礮廠心韙其論蓋  
閩廠地基堅固規模宏闊工匠眾多其中機廠皆足備  
用若就原有之拉鐵鑄鐵各廠增置機器以製十八頓

之礮當所能爲特是鑄巨礮最難德國克虜伯廠中能主持鑪冶心知其意者止有二人故巨礮難於猝成卽成亦不能多惟有一面購備一面學製若陸路行營車礮其用尤廣其製尙易近來考求洋兵陸戰專恃礮隊擅長槍隊次之以槍禦礮短長懸遠勝負立形若中國有礮隊則彼之長技盡失故行營礮尤不可緩如克虜伯車礮之六生特七生特半口徑者南北皆宜之八生特口徑者北方平原以及守營攻壘宜之其機器購之德國葛魯孫廠又有烏拉秋司行營鋼銅礮內用鋼管外用銅套雙層緊束以水力壓擠性純質輕亦可參用

其法以期利便其機器購之德國奧國各廠連珠礮則諾登飛哈乞開思兩種皆良而哈乞開思新加爲二寸徑之礮彈可穿雷艇其用尤精其機器購之德國力拂廠又有分截行營鋼礮分攜合放利於踰山行遠德國克虜伯廠有之又田雞礮製樸價廉利於憑城據嶺夾岸擊船英德廠皆有之此上數種華廠足可仿造至各國後膛槍標新闢巧而通國一律從不參差中國各軍亦宜畫一以免彈馬混淆手法錯亂屢經校驗大抵單響者以德之毛瑟爲最擊靶取準遠較遜於馬梯尼三十步而機托堅樸過之連響者以美之五響黎意槍



爲最遠於毛瑟十步近於六響哈乞開思十步而穩定  
不搖槍尾不坐均過之十槍中速於哈乞開思者三槍  
而吐子無病亦過之其機器購之美國林明登廠近毛  
瑟亦有八子連響之式其機器亦購之德國力拂廠如  
於單響連響各擇定一種雇匠購器設廠自造尙不爲  
難又如各種水雷以魚雷最爲猛烈一物而兼船礮雷  
三者之用而布扼海口則有浮雷沈雷撞雷伏雷伺雷  
射雷專視港口淺深以別其用其中機竅繁細電機雷  
括弁之毫釐臣近飭各員及所延西人悉心考校雖內  
中膽管購自外洋而模範筒殼皆能自製雷艇形模較

小機器尙簡亦應隨雷自製既有精槍礮尤宜有精火藥既求力猛且防漲裂德廠礮則宜用杜屯考甫廠之棕色藥英廠礮則宜用一孔餅子藥擬先製測驗漲力速率之機器再向各廠購法雇匠仿造并造炸藥棉藥則可以因應不窮矣至洋師洋匠惟宜求之德國其人性樸而學精近年所製各種船械甲於歐洲各國取法造槍或可用美匠造雷或可用丹匠此兩國人性和平尙能盡力此外他國夸詐不馴平日則不盡其術臨時則刁難變幻甚多斷不可用粵工多習洋藝習見機器於造槍造彈造藥造雷皆知門徑香港素多鐵工尤易

招致擬歸閩廠造礮而礮彈及隨礮各件附焉粵廠造槍造雷造藥而槍彈雷艇及隨槍各件附焉槍廠行之有效則漸可試造行礮各省撥用者繳價歸廠兩廠既成各省皆足臣以爲宜急籌者二也次曰開地利山澤之利王者所重外洋富強全資煤鐵我中國煤鐵之富遠駕四洲如謀製船礮取資重洋以銀易鐵何所底止況中國之鐵質堅栗而性柔韌以製礮槍實勝洋產徒以考地不精故鑿空而無得不能深求故得而旋棄不知煉法故不盡其用茲擬訪求外國專門鑛師三人或搜求地隔或化分鑛質或煎煉成器各專其責搜求得

地再考化分化分有質則歸煎煉儻能煉鐵成鋼其用  
尤大至煉生鐵宜用高爐汽機風具煉熟鐵宜用砂爐  
氣錘煉鋼鐵宜用畢士買爐西門馬丁爐緣中國鐵質  
多夾磷硫皆須先煉出磺強水再入爐冶始成純質儻  
非實得眞授貿然開采徒耗巨資考福建之穆源古田  
安溪等處皆產善鐵兼饒煤堊卽廣東之惠州清遠等  
處產鐵亦佳粵商豔此利者頗多集股亦易臣近於省  
城設立礦物局招商試辦茲已略運礦砂到省開爐試  
煉如有實效再行分投勘辦礦本所需由商鳩股而地  
勢便否土民願否則由官酌度以免滋事閩礦供閩粵

鑛供粵大抵商人自謀約有數弊一不能延聘真師二不能考尋善地三不能烹煉得法四不能得貨卽售如官爲聘師尋地授法考工所產之鐵收歸官用則槍礮因有煤鐵而工易成煤鐵因鑄槍礮而銷易廣二者相輔商得其利官收其功且購之內地其價必廉於外洋轉輸不竭實爲藏富於民之道異時鐵艦火路資用尤繁如使此事可成人情驚利踊躍爭趨集資益宏取效益遠臣以爲宜急籌者三也斯三者相濟爲用有人材而後器械精有煤鐵而後器械足有煤鐵器械而後人材得以盡其用得之則權利操諸我失之則取予仰於

人而粵省尤爲要策大抵外洋入華必以粵海爲首衝  
粵防能固彼卽越疆遠襲而軍火接濟書報往來皆須  
取道粵疆如其兵精械足守固財饒水師陸師俱成勁  
旅大敵來則欵船依臺入口自防小敵來則縱船出洋  
橫海邀截彼斷不能深入狂駛肆意侵陵又况自廣而  
桂而滇沿邊二千餘里以後三省邊防永無弛期所需  
軍火槍礮之屬委輸取求皆於粵東是賴若儲侍充足  
則不惟供支滇桂并可波及湖湘故欲辦東南海防西  
南邊防均不能不先立基於粵海而立基之要則以人  
材器械地利爲先惟是百端并舉一省難支竊計閩與

粵鄰聲氣相通臺瓊孤懸海外形勢又相類既爲輔車  
唇齒之依卽宜爲率然首尾之應兩省各盡其力各專  
其任成事則相資用法則互考務使智勇聰明日增月  
益大開風氣則南洋成一關鍵實天下得一轉樞儻再  
遷延歲月不汲汲爲補牢求艾之謀以後海防日亟邊  
患日深何從措手臣愚以爲今日之務無急於此惟念  
三者籌資甚鉅莫敢爲先因思近蒙天恩允准定借洋  
款內有定購美國氣礮一百萬兩昨據出使美國參贊  
蔡國楨電稱該礮蓄氣不足其製未精未與定購擬請  
提動此款以爲粵省學堂槍廠雷廠之需又查閩省新

借洋款四百萬兩一時當難用竣當可以提百萬以爲  
閩廠製礮之用約計造槍藥雷艇機器營建廠基洋師  
洋匠來華資費開辦物料需費在百萬內外若造大礮  
各種行礮機器洋匠物料亦將百萬幸閩無造廠之費  
爲數約略相敵籌辦之始當可足敷以後常年經費除  
各省分用收回原價外當再隨時核計另籌專款果能  
製造日精人材日出物產日增則因機利導鐵艦火路  
次第舉行可絕外人壟斷之謀卽建中國久大之業天  
下幸甚左宗棠楊昌濬老成碩畫度早已成算在胸特  
以事本貫通必須齊力協規不能不連類而及如蒙俞



允應請敕下左宗棠楊昌濬等籌議奏辦臣當咨商閩省并分致南北洋暨外洋出使大臣詳考學堂章程及槍礮船雷機器各種價值設廠雇匠各項工程及早開辦隨時詳細奏報

旨留中欽此

教練廣勝軍專習洋戰片

光緒十一年五月二十五日

再越地滇粵諸軍與法人攻戰累年利鈍亦已共見查洋兵陸戰首恃過山礮隊次則連響快槍然而身帶槍彈乾糧洋酒皮墊等物約重十許斤殊爲累重每欲進兵先修寬路進不馳驟退必安眠禦之之法若我亦有

及遠之行礮快槍各帶短刀散隊分擊伏地疾進要之  
險隘迫之藪澤分番夜擾不使休息必能取勝至於地  
營地雷均爲守壘扼險所必需惟是礮準槍機營工雷  
式非經訓練臨敵終無把握大抵膽力本於天生謀略  
視乎臨事軍火技巧練之平時特是湘軍營堅戰勇而  
於洋式軍火每多不屑深求淮軍於洋械素知講求而  
步趨洋操頗嫌太板粵軍最爲悍猛不畏礮火而平日  
不耐勞煩憚工作而厭操練三者各有所長自成風氣  
若欲督責諸將領驟令就我繩墨頗有所難查總兵李  
先義久在津滬於外洋軍火素稱熟悉所部廣勝軍五

營皆擇其才力強健而又受約束耐勞苦者該軍新立章程不分門戶營哨各官不拘一省勇丁南北皆有限一方近日多購克虜伯行營車礮上等快槍發給該軍精加練習舊式刀矛概屏不用專練數端一礮準一臥槍一散隊一夜戰一疾行一踰濠登山一造地營一安地雷一兼演洋式火箭行軍電綫兼派洋弁爲教習但學其鎮靜嚴肅之意槍礮取準之法築臺造壘之式考究洋械機括子藥利病至洋操陣式屬聚方行隊伍甚板進退遲鈍近日關越諸捷屢以此爲我軍所乘斷宜棄之不學口令概用華言以防流弊其營規紀律築

壘掘濠諸工作則採用湘淮規制明定賞罰嚴加考核  
每半月臣親臨校閱一次總以近日之實驗爲師不以  
舊式之虛文爲美期於專備洋戰避短用長務成勁旅  
俟一軍練有成效再當推行諸營以期次第改觀  
旨知道了欽此

雇募德弁片

光緒十一年五月二十五日

再今日行軍要務如施放各種後膛槍礮魚雷水雷以  
及測繪地圖建造各種礮臺急就土壘行軍電綫安設  
地雷修整軍器諸事宜將士皆當通曉外洋將弁類皆  
出身學堂練習有素現當講求海防之際必須有洋弁

爲之教習則兵勇工匠人等易得竅要查各國武備近以德國爲最精而且親睦中華確有協助之誠去年開戰以來凡粵省與德商辦諸事從不以局外宣戰等語藉口推謝皆係依期到粵故軍事需用西人惟該國人尙爲可信當經電致出使大臣李鳳苞與德國海部密商選派藝優性穩之德弁四員計雷芬一員每月給薪水銀三百兩郎概一員每月給薪水銀二百兩賴格一員每月給薪水銀六十兩該員另給飯食均於光緒十年十月二十一日抵粵馬駟一員每月給薪水銀三百兩於光緒十年十二月十五日抵粵又電致出使大臣

許景澄選訂德弁柏廬歐披次二員每員每年給薪水銀三千六百兩於光緒十一年四月初七日抵粵又令在籍候選道何獻墀在香港訪募德弁威勒西一員每月給薪水銀一百四十四兩於光緒十年十月十六日抵粵以上七員於上項各種藝法各有所長皆能教練均與先後訂立合同來華差遣其薪水均係在德國議定數目照合同支給并與訂明如改用中國冠服照德國官階給與武職品級頂戴雷芬馬駟均應給四品頂戴郎概柏廬歐披次均應給五品頂戴賴格威勒西均應給六品頂戴等語抵粵之後臣詳加考校諸能嫺習

當經分別派充各項教習其薪水飯食等項銀兩卽就各該洋弁抵粵之日起支其來粵川費及繙譯通事工金均於薪水外另行支給據善後海防局司道詳請奏咨前來查該德弁等身列營伍當封口宣戰之時遠來效用而且願遵用中國冠服其輸誠慕化洵屬可嘉該弁等在其本國原係有職人員卽改華服似宜戴用頂戴合無仰懇天恩俯准照原訂合同分別賞給頂戴以資鈐束而策後效將來若教練著有成效再當奏請獎勵

旨德弁雷芬等均著照所請分別賞給頂戴該衙門知

道欽此

展設欽廉雷瓊電綫片

再瓊州孤懸海外正與越之海防一口相直廉州所屬海面欽州所屬陸路皆與越接各該處文報素遲急遞亦在十日之外設有兵警廉欽則調度難施瓊郡則音信阻絕實爲可慮上年海防緊急各路戒嚴港越之間法船如織惟有趕造電綫以捷軍報當飭直隸候補道盛宣懷詳籌定議飭善後局會同總辦兩廣電報局副將王榮和委員分道勘估次第興辦所需外洋物料分向上海香港等處采購有倉卒難集者並與丹國大北



電綫公司商借乃就兩廣原綫設法展接自橫州舊綫南出一歧作綫經靈山合浦達廉州府城南抵北海計綫路三百四十四里由廉州作綫東行經遂溪海康徐聞至雷州府屬海安所二塘港口入海作綫南行渡海至瓊州屬海口迤西之天尾村登岸東行達瓊州府城東抵海口中間海港溪河分設水綫數處計水陸綫路共五百一十六里海綫四十七里有奇瓊口海綫上岸之處擇於水淺地僻處所卽有兵事不致爲敵所斷自廉州府城新綫西出一歧達欽州城計綫路二百里有奇又查龍州至鎮南關尙一百二十里冬春之間關內

外戰事方急電信到龍後與前敵往返馳報動須三四日不免仍有遲誤關內十五里爲幕府以後邊防難弛商路新開此地常有大將屯兵之所應接龍州舊綫南行直抵幕府計綫路將及一百里所設各綫路係作工時相度地勢裁彎取直移濕就燥較之原勘里數略有出入合計有減無增分設廉州北海雷州瓊州欽州局各一添設潯州局一以便察驗通塞隨時修理所需工料各費於海防經費項下動支惟水綫較陸綫爲貴海綫尤貴因欲趁臺事方急時趕設海綫故十月中旬海綫先成嗣據報橫廉綫於十二月十九日竣工廉瓊綫

於二月二十九日竣工廉欽綫於二月初十日竣工久  
經分投傳報龍州幕府新綫因潯梧大水運料阻滯近  
日電綫中阻尙未據報於本月內亦可竣工各局所收  
商報藉以津貼巡修局費據善後局司道詳請奏咨前  
來除電奏並咨總理衙門戶部外理合附陳伏祈聖鑒  
旨該衙門知道欽此

試造淺水輪船摺

光緒十一年五月二十五日

竊惟海防之要無論戰守必有水師戰船以援礮臺礮  
臺以護戰船臺船相輔其用乃宏南北洋尙有快船衝  
船數艘粵東則并此無之僅有閩廠撥來舊製飛雲濟

安兩兵船去年六月初旬聞法船集於馬尾卽日派往  
赴援督帶官參將高騰雲戰沒兩船皆燬此外本省中  
小各輪皆非戰船僅可供捕盜緝私轉運之用其洋製  
仿製文子船兩艘不能出海卽用之內河而破笨船脆  
受敵則不固運駛則不靈亦欲購製戰艦而時日旣難  
猝辦經費亦無所出惟有經營破臺廣購軍火以爲陸  
防陸戰之計然而虎門廣闊五門紛歧西江後路時有  
擣虛拊背之憂望洋興歎終非長策且日視法艦之往  
來港越濟餉濟兵竟無從稍梗凶鋒實深憤懣因與署  
水師提督臣方耀籌議巨艦快船固不可期若有淺水

輪船十餘艘縱不能縱橫於大洋亦可馳逐於六門之內外其時海警方殷未知所屆若不反求諸已探討經營三年之艾何由而得適於冬間有閩姓捐餉之舉蒙恩允准決計酌提此款創始爲之查黃埔向有船澳係光緒三年前督臣劉坤一購之英商者乃博訪水師將弁招致香港工匠采取香港華洋船廠圖式令明於算理者推究斟酌度華工之所能爲者擬成一式大率長英尺十一丈廣一丈八尺艙深八尺六寸喫水六尺馬力七十八匹內用康邦臥機冷水氣櫃雙輪暗車前後兩桅桅身上半可以伸縮下用鐵脊旁施鋼板船頭後

故之藏之不能

成二艘十月內可成二艘四艘成後如尙利用卽當籌款續造察其機鑪馬力是否靈捷堅固船身破位是否量配停勻儻有不精隨時修改俟有募到洋匠更可與之商榷有此船十艘可以衛虎門有三十艘可以徧防五門旁扼西海謹當隨時籌畫造船養船專款量力爲之船成以後所有額設綠營水師紅單船概行裁汰捕盜緝私以此代之其船費兵餉亦可併養此項淺輪語云大輅始於椎輪又云不索何獲從此員弁工匠身親其事心通其法自當益造益精未嘗非練習人材之一道所有用費應俟工竣時核實奏報要之此船但爲守

禦六門而設若欲攻擊羣舸出沒重洋非有鐵甲穹甲快船之屬不可體大法精需費亦鉅工料稍差卽成棄物且中國學製廠地機器工師物料諸須創爲成工亦太遲緩此時惟有專籌巨款購之外洋以應急需及此三數年間練駕駛於中華學製造於西國兩者確有把握方可舉辦謹當另疏籌議上陳

旨據奏試造淺水輪船現已先造四艘著俟造成後詳加察看如果合用再行奏明辦理該衙門知道欽此



張文襄公全集卷十一終

新城王樹桂校

張文襄公全集卷十二

奏議十二

創造礮划設立廣安水軍摺

光緒十一年五月二十五日

竊惟粵東防務當去年秋冬之間中路首衝自虎門以內至黃埔魚珠沙路南石頭等處水陸戰守之具已有規模惟迤西蕉門橫門磨刀門虎跳門厓門五口外廣而內歧交午旁通皆可互達巨艦可入口百里或數十里中小輪則可由五門而薄省垣由磨刀門入西江而薄肇慶敵若犯境必以巨艦綴我中路而以餘船旁突五門窺我堂奧雖於西路近外之盤古廟梅角村菱角

洲右口汎博刀沙大律口圭沙等處近內之陳頭五斗口蔗園口銀河口東濬口等處築壩造簾酌量攔塞分築土臺屯軍安礮特是臺粗礮小力量殊薄若無水師萬一敵船闖入省河將坐視其縱橫城下復經分駐紅單船水勇以助各臺調集各路巡緝扒船以資策應然而紅單重滯非風不行板屋高大招礮引火扒船頭方底平行駛甚遲船腰有艙阻塞漿路皆非戰具徒以別無可用之船不得不姑就固有者布置應急至臘正之交警報日亟皆謂將襲五門以窺粵省臣之洞臣文蔚屢與將弁詢究省河如何防禦率多游移無詞此時欲

製淺水輪船而倉卒難成已購外洋雷艇而阻絕難到  
不得已而思其次惟有用舢板礮划之一法蓋省河非  
鐵艦所能到礮划以多制寡以小制大以散制整未爲  
非計查法人慣用水雷傷我兵輪惟有舢板可以防彼  
攻襲本年正月十五十七等日浙江鎮海口內南洋兵  
輪三艘將法船雷艇擊敗卽得舢板之力是此船可以  
禦敵確有明徵去冬已先令署南海縣知縣同知危德  
連試造數號驗之可用因與臣玉麟籌商定議卽委危  
德連暨提督王光耀前記名總兵柏正才購料設廠創  
造舢板礮划一百號募勇配礮以百號分爲三營統名

爲廣安水軍營制餉章俱照長江水師規制間有不便  
稍加變通照章併造長龍四號爲統領營官營務處乘  
用一切工匠由臣玉麟向長江調集併令熟習樸實之  
營弁親兵監造選派湘軍習於水師之將弁爲統帶營  
哨官其募配水勇之法定爲湘勇三分之二粵勇三分  
之一非導以湘勇不解駕駛非參以粵勇無從練習他  
年運用漸熟便可多配粵軍緣紅單扒船起居皆便長  
江礮划船面無屋夜施布帳粵勇敢戰而不耐苦故向  
不喜用此式之船前撫臣蔣益澧曾於粵省造船板多  
隻以供巡緝行用靈捷有案可據此船製造甚速早經

造成多隻六月內一律竣工即可成軍操演爲粵省內  
河水師開此風氣大抵粵防爲五門計爲省河計以多  
造淺水輪船多購魚雷艇多布水雷爲上策此數百里  
間縱橫港汊彌望沮洳無地可以建堅壘無路可以通  
軍行目前勉造土臺類多孤露隔絕蓋其地勢斷非礮  
臺所能徧防陸營所能肆應無陸隊則礮臺爲孤注無  
臺船護守則攔河椿壩船水雷皆爲棄物方今巨艦  
水師未成淺水輪船未備惟有礮划水軍之舉尙可剋  
期觀成此外更無防守內河之法要之以槳船禦兵輪  
似乎不敵然而裏河支港迅駛環攻護我之水雷擊彼

之雷艇雖無摧破巨艦之大力確有便捷如意之實用  
粵省刼盜最多水路尤甚舊設之扒船器械朽鈍練兵  
饑疲積習亦深將來防務大定卽以此項礮划分撥附  
近省河各段巡緝漸減舊船勝之遠矣其造船工料編  
營薪糧配用礮械應俟成軍後核實奏報目前卽將所  
募紅單水勇先行裁撤移其船租餉項以充此軍之用  
旨知道了卽著照所議辦理該尙書等務當督飭各員  
覈實製造隨時認真操練以資巡緝該部知道欽此

籌辦劉永福內徙情形摺

光緒十一年六月初六日

竊臣於二月二十三日欽奉二十二日電旨法人現來

請和於津約外別無要求業經允其所請等因欽此同日又奉電旨劉永福一軍必須妥爲安插等因欽此臣查津約第一條有無論何人侵犯北圻中國均應保全護助之語法人此條之意卽指劉永福而言法與永福仇衅山積永福不去越則法人必不相容中國旣不能違約而助永福然永福曾經授職統軍爲國宣力亦斷無代法人翦除之理惟有令其去越則葛藤自解旣可結束款局兼可保全猛將其時適接雲貴督臣岑毓英咨電謂永福遣弁來粵募勇意欲東來就餉該督詞意甚以永福離滇赴粵爲喜此臣調屯思欽之議所由來



也嗣經委員孫鴻勳等賁文赴越傳達停戰撤兵諭旨  
該員親見永福剴切宣諭據永福面稱感激天恩深願  
內徙惟在越年久部多累重但求妥爲措置俾得成行  
委員帶回一稟內有請示數條一求帶舊部三千人入  
關一請給木質關防以資統率一歷年軍士戰沒者家  
屬皆加收養約有數千家義難棄之此項丁口求爲安  
置一歷年出力傷亡將士乞臣奏請獎卹一積年礮械  
甚多乞爲設法運致一備言保勝險要擬令其子通判  
劉成良留守其地以固滇防等語臣體察情形若不許  
其統帶數營則心不自安又似置之閒散必不樂於內

附多帶越眾則其部下不盡馴謹恐日後轉爲永福之累因岑毓英咨有劉部并招回黃部不過二千人之語故許其帶一二千人如得力舊部不多數百亦可不必勉強湊數以少爲佳入關後必令募足五營關防許其入邊發給其餘眾丁口則令給貲留越安業謀生獎卹則允爲上請礮械則告以精者酌帶粗者稟商岑毓英酌辦內地精械甚多毋庸搬運勞費至其子劉成良留越一節則駁飭不准以前餉項目前資費則咨照岑毓英於解到劉餉從寬發給當經逐條批答併咨岑毓英轉飭酌辦兼令唐景崧加函催促各在案獎卹一條當

經電奏仰蒙俞允由臣奏請種種招徠無非欲其速入  
邊關早定款局復派總兵馬宗駿州判孫鴻勳等再往  
敦趣乃接岑毓英函咨但云五月中啟行唐景崧接永  
福四月二十七日來信亦無准期而法人方且坐踞澎  
湖以待保勝之退嚴旨屢下西顧憂勞若再遷延相持  
成何事體查永福征戰越境二十餘年根深柢固一旦  
盡棄故壘重覓新巢實非容易自法攻北圻以來越官  
率多依附永福聞其內調咸詣委員請留今滇軍已撤  
越人糾眾拒法者甚多更必藉永福以爲固雖永福左  
有敗後部眾多離而其積威虛聲尙足悚動法越法酋

勃里也及五晝以下兵官日向委員探問永福之去否  
以臣揣之大抵永福一人甚願內徙而難免不爲部眾  
所累越人所留不來則懼負朝恩來則重棄故土是以  
動多牽制大有進退維谷之情昨據永福二月遣來募  
勇之營官劉正興面稱接永福信知己將資產陸續變  
賣遷移如因道遠累重猝難赴粵亦必讓出保勝就近  
先移滇境等語惟是廣越相去二千餘里該軍實情殊  
難遙度岑毓英近在咫尺其撫馭機宜可以隨方因應  
宣慰操縱似尙非難臣又嚴檄永福令其迅速啟程遵  
旨先入雲境再議東行一切措置之法迭次函檄批稟

俱已周詳其有未盡事宜變通辦法令其就近稟商岑毓英酌辦不得以聽候粵批爲詞亦毋庸俟委員到彼致稽行期并函致岑毓英永福應帶若干人先到何處屯紮餘眾若何安置輜重礮械若何運致或竟難赴粵止肯稍移至滇邊地界悉請該督就近裁酌并囑察其是否果能離越如實有爲難之處亦令其切實稟覆飛速奏達上聽聖裁所有催調劉永福近日情形除隨時電奏外理合繕摺具奏如有諭飭辦理之處仰懇先由電旨傳達俾臣早得奉到遵行

旨覽奏均悉前據岑毓英電奏劉永福一軍據報於五

月二十四日起程赴粵沿途夫役糧米已飭開化廣南兩府備辦諒可進行無阻目下該提督計將抵粵卽著該督懷遵前旨飭令迅赴思欽一帶妥爲安置欽此

劉永福舊部另投別軍片

光緒十一年六月初六日

再據劉永福四月間稟稱該提督舊部員弁營官黃俊芳謝炳安陸東環劉文謙朱冰清梁三劉志雄練忠和王玉珠韋高魁鄧遇霖梁茂林等十二人哨弁黃爵元等十人均係另投別軍現紮越南紅花江一帶此項舊部現隨別營不同進關者日後有無事故不與永福干涉等語又接岑毓英五月初一日電稱劉團自左育潰

後逃歸阮光碧王玉珠湯宗政三處不下千人朱冰清  
劉文謙劉志雄等帶歸何元鳳六百人又黃俊芳梁茂  
林陸東環謝炳安等各帶各部歸覃修綱張世榮又千  
餘人所存不過數百人謬爲大言該督過保勝曾詰之  
等語體察永福來稟之意殆深恐黃俊芳等各樹一幟  
不肯附從知其散處越地將來必爲法梗意在聲明已  
投他軍以免後累岑毓英此電之意蓋力斥永福之非  
謂其不應大言部眾多人求索重餉然電稟互證是以  
上諸人現不在永福部下尙屬可信查近日越地游勇  
義民結營拒法者蠡起諒平一帶華越約六七千人宜

與以上華越約二萬餘人大率越人自知必遭法虐又  
已習見法兵伎倆故連結游勇供給糧米與法爲難恐  
非法人一時所能安戢亦非中國之力所能措處永福  
能速離越入滇中國卽已踐言此外只可付之不問故  
永福之部眾漸離在永福則爲失勢而在中國則甚爲  
有益誠恐法人強指爲永福部下籍口刁難謹先陳明  
以備總署辯論駁折  
旨該衙門知道欽此

妥籌安置劉永福事宜摺

光緒十一年六月二十九日

竊臣屢接雲貴督臣岑毓英咨并劉永福來稟知已率



其家屬部眾移入滇界文山縣地方所有該提督遠行不易暨現在催調情形疊經臣電奏驛奏在案該提督到粵之期計亦不遠必須及早籌定辦法以期經久無弊竊惟朝廷所以處永福者必兼安插保全任使三義而有之乃爲周妥欲息邊衅故須安插該提督素有忠勇之名敵國所憚故須保全予以高官資以重兵厚餉若置之冗散則虛糜可惜故亦須量能任使俾該提督得盡其長而國家得收其用查安插之地兩廣邊腹皆不相宜臣原議欲處以思欽者爲其鄉土所在且欲資以捍邊也前兩年法人來議越事但云溯紅江通滇境

尙無通桂之說今年停戰之始臣曾力請將諒山廣安等省留爲甌脫因未悉詳約通商已兼滇桂又請拒其桂境通商蓋中法隔絕則處此自無所嫌今桂岸之商已許甌脫之議不行而思欽教民最多以永福處此其部下與越太習出入莫禁聲氣相通設越民稍有不靖必爲法人藉口不曰黑旗之舊部則曰粵將之指揮衅隙滋多聞該提督已自不願若處之歸順鎮安等州其地毗連保樂旣接越邊亦近滇境其不便與思欽文山略同若如該提督所請處之南甯則此地滇桂樞紐商民輻湊尤非屯兵之所桂省官民皆不謂便若處之內

地甚或移之他省則南北異地山海異宜部眾必不願從行即使果行亦歸無用且該提督爲人性情直率禮節麤疏一半年後疆臣或以節餉之故而罷其兵文吏或指部卒之疵而攻其短枝節紛紜必致該提督終受其累亦甚非朝廷招徠激勵之本意也臣愚熟思惟有處之瓊州則一無窒礙而於海防甚有益粵防惟瓊防爲最可慮其地之荒陋貧瘠不及臺灣什之一而最近越南海防港口朝發夕至去年以來法船屢來量水窺探設有敵警惟有付之良將獎率瓊島軍民自爲戰守無從援應瓊防固則可與廉郡犄角爲外洋入華之梗

瓊防疏則敵人得以屯泊舟師休息兵馬爲粵省眉睫之憂而且內防峒黎外備海盜水土惡劣將吏視爲畏途欲求良將正苦乏人查岑毓英奏屢有簡授劉永福一實缺海疆總兵之請竊思若朝廷卽以瓊州鎮處之似甚相宜大要其利有五瓊越隔海法於海防譏禁甚嚴華人無保人執照者不得登岸該提督部下旣無挑衅之方法人亦無吹誣之具法疑旣釋永福亦安一也非使該提督統帶一軍則體貌太輕部曲難散勢必不能內附故臣曾許其到粵募足五營然此五營之餉加以薪費軍火一年所費不貲惟瓊州防海防黎近數年

來常有四五營屯駐其地越事既起陸續增至水陸十一營事平以後亦難全撤然細考歷年瓊防各營未見一律精銳該提督所部不惟能戰而且耐炎瘴習山險較之外募利鈍迥別減彼增此則養此五營不爲虛耗二也該提督近年部眾稍離由於越亂商阻稅失餉缺今正左育之挫由於我之重兵俱在宣光僅能分兵往援該軍血戰兩日遂不能支然其勇猛威名久播四裔本年三月委員到越與法酋勃里也及大小兵官言及畏忌之情形諸詞色親見法兵船上所懸畫圖皆繪劉永福歷次擊敗法兵戰狀粵省及外埠各國洋人談及

該提督無不敬服稱贊以諸藩敬憚之人扼南洋首衝之島則隱然有老羆當道之勢萬一法人再萌窺伺該提督上爲公義下爲私讎必能力戰死守無勞督策且必終日防維隨事經畫將使叢爾孤島屹若長城三也瓊州生黎年年出巢侵掠終未一大紐之餉不耗於剿而耗於防軍不死於戰而死於病列戍相持實非勝算故臣於上年冬底請獎剿黎疏內陳明以後尙須大舉剿辦然而內地將士斷不能踰險深入以該提督所部辦此自易得力且猛將健卒勞則有功逸則生事責以剿生撫熟伐木開山其事亦非一兩年所能遽定瓊屬

昌化銅鑛極旺久爲各國垂涎更以餘力督率所部開鑛墾田則瓊州之內患旣除地利亦興其益甚廣四也該提督輸誠內附斷無可疑深感國恩惟有竭力圖報若必慮其部眾稍雜恐有不馴則瓊島孤懸一應軍火餉銀糧米無一不仰給內地譬如嬰兒專待乳哺六轡在手控馭非難五也兼此五利似於安插保全任使之道均尙有合反覆思之無踰於此惟處之瓊州卽宜授以實缺若徒使屯紮其地則形迹似乎流徙必生疑畏查本任瓊州鎮總兵賴鎮邊人甚開展明練而未見有獨當艱鉅之才升任後現尙仍在大鵬協本任爲處劉

永福計似可將賴鎮邊調任他省總兵一缺如臣議尙有可采可否由電密諭臣知緣處桂處瓊辦法不同以便豫爲籌計俟該提督有赴粵起程確信臣卽當電奏上聞再請明旨簡授伏思該提督倔强越地垂二十年所任三宣提督轄境甚廣其保勝地方營壘礮臺累年經營極稱完固自興化以上數百里沿江險仄人馬不能並行實有一夫當關之勢且獨此數百里間山嶺迴複毒瘴薰蒸外人斷不能堪而保勝以南則爲三猛十州之地內通老撾田多米廣近年已爲黑旗黃旗據有十分之六築室墾田於其中丁口蕃息資產縣延目前



雖不盡屬劉部然該提督若不去越則此輩可離而亦可合該提督屯踞已久儼然有土司酋長之勢越官越民奉令惟謹臣此次檄調議者咸料其不來今一旦盡棄故壘率眾來歸非感激聖恩恪遵朝命斷不至是查該提督在越與法本無妨礙徒以受越之官忠越之事忿越之坐受魚肉挺身血戰積成深讎法人屢經招之該提督義不肯往觀其盡忠於藩國知其必能効節於皇朝惟望朝廷優異矜全顯以作天下忠臣勇士之氣而隱以固孤危難守之瓊粵防幸甚

旨張之洞奏安置劉永福事宜一摺覽奏均悉瓊州孤

懸海外選將駐兵諸宜審慎劉永福到粵後著張之洞傳見詳加察看將其性情才略究竟何如所部勇丁是否安靜守法據實電奏候旨定奪欽此

緩開塞河片

光緒十一年六月二十九日

再廣東省城洋船馬頭向在黃埔距省四十里自咸豐末年始駛入城西南四里之沙面白鵝潭查省河入虎門後至黃埔尾之長洲分爲兩支南一支溯流經沙路至沙面北一支溯流經魚珠過省城南亦至沙面北支較淺南支較深沙路計攔截兩道外沈船石內作橋樁魚珠內至中流沙亦攔截兩道去年七月海防戒嚴卽

將沙路一支兩層口門塞斷華洋官商輪船專由魚珠一路行走魚珠暨中流沙留口門十五丈其商船較大者卽至黃埔起刺換船入內至各國護商兵船洋行往來香港之渡輪仍可駛至沙面行之十閱月毫無窒礙今和局已定逆揣各國洋人必欲請開各沙路河道惟攔河工程勞費極多將及一年始有規模阻截固難開通亦不易前年秋初議攔河時各領事屢來阻撓極費籌維始能舉辦去年塞斷沙路口門時洋人亦欲阻止嗣見中國戰志甚堅亦遂無詞今擬卽將沙路一支不必開通輪船專由魚珠以後海防較易爲力且攔截器

具設在水中中間空隙皆寬一二丈僅能阻船不能阻水於省城行水絕無妨礙茲特豫爲陳明應請敕下總理衙門查照如遇洋使干瀆時與之辯阻實於海防有益

旨該衙門知道欽此

添建礮臺軍械所片

光緒十一年七月初一日

再粵省外海內河各衝要如虎門內外之沙角大角上下橫檔威遠山黃埔左右之魚珠沙路等處自上年設防以來陸續築臺安礮已有規模惟限於經費日力酌量騰挪布置而水陸遼闊仍嫌礮少臺單如遇有警不

足以資策應臣等周諮將領體察形勢虎門一段沙角以外十三臺取勢甚遠然能外擊而不能內擊威遠橫檔扼敵最衝然能迎擊而不能橫擊且威遠原配巨礮亦少必宜於沙角舊臺地址增臺置礮與威遠橫檔鼎足相倚取勢較緊因於沙角環抱之處依山迤邐築臺四座威遠舊臺背山貼水最爲無法因於舊臺後山半築臺三座又將舊臺八礮移置山阜較高處所築臺八座皆令參差散處不聚一隅下橫檔各臺未能回擊駛過之船因於下橫檔山頂增臺一座上橫檔亦就舊臺添置巨礮一尊以便回擊大角當大洋西來之路礮亦

嫌少因於大角增臺二座黃埔一段長洲較爲完密惟  
魚珠屏蔽趨省陸路原臺尙孤因於魚珠以內之獅山  
築臺二座蟹山增臺一座沙路遠接蓮華山獅子洋最  
爲近外地勢散漫因於沙路以外之馬鞍山增臺二座  
共應添十八臺均采取西法作露天臺式以灰沙洋泥  
層層春築皆有暗道兵房藥庫濱海餘地較寬者酌量  
加築濠牆卽飭各營統領督勇募工分承修築先經臣  
等電託出使大臣李鳳苞與德國兵部議購克虜伯二  
十一生特後膛大礮十六尊本年二月內到齊分發新  
增各臺各臺於春初興工六月告竣大率各臺皆各因

地勢聯絡呼應將弁工匠漸臻熟習臣等復嚴加核計  
故作法較從前各臺爲合經費亦較從前爲省又粵東  
連年購置軍械爲數繁鉅舊有軍裝局地方狹小不敷  
儲放現於新城內素波巷另建軍械所一區正月內興  
工亦經告成此外水陸各隘尙有應增臺壘之處亟宜  
乘此防營未盡裁撤分投舉辦藉資勇力尙可較省較  
速統俟各工一律告竣由各統領委員將工料銀兩覈  
實報局再行核明報銷

旨該部知道欽此

租購調撥各輪船補陳備案片

光緒十一年七月初一日

再廣東省內河外海向設巡緝輪船二十餘號上年防務日緊需輪甚多或分撥沿河沿海防營各統領專供運濟裝械兵夫或專泊虎門稽察華洋輪船瞭望哨探以及防守攔河巡護水雷運送礮臺料物巡徼五門內外至於轉運滇桂越南餉銀軍火電桿兵勇均須輪船拖送梧州幾於無日無之且惠潮廉瓊一帶同時辦防每須由省載送勇丁運解餉械以及傳遞軍報偵探敵情均不可少舊有各輪不敷調遣事機緊迫倉卒無從裝造祇可租購洋輪並將鹽關緝私船隻調撥來防應用援臺事急來往泉閩厦汕之間者需用尤多自光緒



九年十二月起先後共購買中等輪船二號曰廣凱曰廣威小輪船五號曰定功曰報捷曰克膚曰奏捷曰飛電以上共買中小輪船七號均係委員分赴香港等處購辦或係洋行自用之船照價讓出或係洋行出售之船議價購來船身新舊機器精粗質料厚薄未能一律各該船原有水手多屬華人暫資熟手即領駕駛尙未拔補兵額其薪糧各項係比照馬力酌量支給一俟拔補營兵核定薪糧再將各該船長寬丈尺以及購買價值一併造冊送部又租雇中等輪船二號曰益得利曰米利亞士顛租雇小輪船三號曰金安曰金利曰永昌以上輪

船五號本有華人配駕租用久暫無定祇須派員管帶  
毋庸更配人役又調粵海關所設緝私大輪船一號小  
輪船二號運司所設緝私輪船三號與租買各輪船俱  
備轉運巡探之用以上各輪船價值租銀薪糧等項統  
在善後局海防項下開支現在防務漸定其買定之輪  
船卽以之分派巡緝其租雇調撥之船均經分別退還  
謹合詞附片具陳伏祈聖鑒

旨該衙門知道欽此

廣西梧州至龍州展設電綫動用經費開單報銷

摺 光緒十一年七月初一日

竊照光緒九年間法越構兵廣西籌辦邊防事機緊急軍報由驛往來時慮遲緩經前督臣張樹聲會同前廣東撫臣裕寬前廣西撫臣徐延旭於是年十一月二十八日奏明將廣州電綫展至龍州飭令直隸候補道盛宣懷招商承辦廣州至梧州一節其梧州以上由官建造照津滬路綫成本核算約需費十餘萬兩請借用出使經費銀十萬兩分派各省籌還不敷之數由粵籌之奉旨知道了著准其於出使經費項下借用銀十萬兩暫勿庸由各省籌還該衙門知道欽此欽遵在案茲據總辦電報事宜直隸候補道盛宣懷詳稱光緒九年十一

月十八日奉札委辦廣州至龍州電綫以通軍報其廣州至梧州一節仍由商局認辦維時蘇浙閩粵陸綫工程尙未造竣當經移緩就急調回總辦粵閩工程委員知府余昌宇督率員弁工匠人等於九年十一月二十四日由廣州向西開工派都司美世清督同洋匠先行勘路並收備造閩粵陸綫之機器物料挪備應用一面託丹商大北公司向外洋采購照數撥還又派知府黃建笏同知周冕在廣州設局辦理轉運布照磨談震臨赴廣西購辦電桿木料旋照路趨工尙嫌緩不濟急須再添一路分頭趕造以期速成十年正月間復調回總

辦浙閩工程副將王榮和督率銘軍兩哨以及工匠人等  
等於三月十四日馳抵南甯開工造至龍州爲止十年  
間五月兩路工程一律蒞事統計此次添設電綫經費  
共用庫平銀十萬二千五百兩一錢九分三厘四毫七  
絲六忽援照津滬電綫成案分款開單詳請奏銷再廣  
州至梧州所設電綫悉照原議由商人報効惟因趕設  
此綫致將閩粵陸綫工程停待半年商人喫虧尤甚悉  
以由廣州至梧州設綫委員工匠薪工火食等項免向  
商人科派畧示體恤合併聲明等由前來臣查廣西梧  
州至龍州計程約一千六百里鳩工伊始關外戰事適

開實屬途遠機急該道盛宣懷徵調部署前後僅閱半年全工告竣所有經費十萬二千餘兩核之原估十餘萬兩之數有減無浮似應准其照數核銷除撥領出使經費銀十萬兩外其不敷二千五百一兩一錢九分三厘四毫七絲六忽查照原案由粵省籌款發給以清款目所有廣西梧州至龍州展設電綫動用經費援照津滬電綫成案開單核實報銷緣由理合開具簡明清單會同廣東撫臣倪文蔚護理廣西撫臣李秉衡繕摺具奏伏祈聖鑒

旨該衙門知道單併發欽此

甄別貪劣不職正佐各員摺

光緒十一年八月初一日

竊惟廣東吏道猥雜法廉罕講疊經臣等屢疏瀝陳臣之洞本年正月奏參不職文武摺內曾經聲明地方各官另行察看甄別在案茲經臣等會同隨時體察查有試用知府鄒觀臯每經奉委出差專務需索查辦沙田案物議沸騰候補同知李玉棻藉差營私不顧公事候補同知際安試用通判潤惠均係充當釐差聲名平常試用通判劉鼎鑛營招搖膽大妄爲聲名最劣試用通判范鼎委辦土火藥局開報工料多有不實署儋州事試用知縣黃湘林性情粗鄙苛索地方英德縣知縣秦

侍堯才識庸陋不勤民事署揭陽縣事電白縣知縣鄭  
履端平日公事尙稱明晰不知循分營求妄爲署徐聞  
縣事試用知縣宗樹蘭年力衰頽難期振作候補知縣  
陳惟不修行檢難膺民社試用通判陶家馥試用縣丞  
張正容試用從九品符國瑞俱充海防捐局委員勾結  
土棍包攬承充漁利擾商肆行無忌香山縣丞倪文寶  
操守不謹嗜利擾民所有鄒觀臯一員應請旨卽行革  
職李玉棻際安潤惠三員均請以府經歷縣丞降補劉  
鼎一員應請卽行革職永不敘用范鼎一員應請暫行  
革職確切查究責令賠繳俟查辦完結後再行奏明請



旨辦理黃湘林一員應請卽行革職秦侍堯鄭履端二員均請以府經歷縣丞降補其英德縣一缺粵省現有應補人員應請扣留外補宗樹蘭一員應請勒令休致陳惟一員應請以巡檢降補陶家馥張正容符國瑞三員均請卽行革職符國瑞一員情節尤重並請永不敘用倪文寶一員應請卽行革職此外道府州縣佐貳中有乖官方者尙復不少惟舊染過重參不勝參當擇其事屬既往情節稍輕者驅逐回籍免令敗羣害政其法難姑容者仍當隨時嚴察認真沙汰以期吏治蒸蒸日上臻起色

旨另有旨欽此

特參鹽務洋務營伍不職各員摺

光緒十一年八月初一日

竊查粵省不職地方官吏業經臣會同東撫臣查參另摺具奏茲查有潮州運同錢瑨糊塗濫用信任非人欠課甚多屢催罔應借領運木拖欠尙鉅查潮橋爲粵鹽大宗獨當一面儻馴致巨款無著關繫非輕現經檄飭運司委員查辦并派潮州府知府朱丙壽會同該運同經理以期維持大局相應請旨將錢瑨暫行革職仍留本任勒限運銷如逾限不完卽行從嚴參辦候補運同江懋勳居心險詐罔利營私累商欽怨委充省河緝私

毫無整頓並訪聞有緝獲私鹽隱匿入已及賣放漏釐私貨情弊應請卽行革職仍嚴行查辦追繳候補運同鄧清鳳委充梧州緝私不恤商情專務漁利應請以鹽知事降補洋務委員陽春縣丞薛瑤光前因被人參劾奉旨查辦經臣於上年八月會同尙書臣彭玉麟奏明隨時察看一年以來詳查該縣丞僅通洋話並無所長當差既屬貪鄙心術尤多悖謬應請卽行革職驅逐回籍交地方官嚴加管束不准在粵逗留生事署欽州營參將候補副將莫善喜所部營勇缺額太多性情殘暴多玷官箴惟該副將素有驍勇敢戰之名應請卽行革

職仍留於省城防營効力責令自贖署新會營參將候  
補副將柏慶不諳兵事需索汎弁拔補兵缺不公應請  
以都司降補儘先參將鄧韞輝不守營規貪利生事應  
請卽行革職署佛山鎮都司候補都司謝其中履歷含  
糊在任比匪縱盜貪黷卑鄙應請卽行革職永不敘用  
旨另有旨欽此

密陳求治需才情形片

光緒十一年八月初一日

再竊惟自強之道從自治始漢臣諸葛亮之治蜀法度  
立而兵食乃足故撫臣胡林翼之治楚名實核而征討  
有功故吏治之與邊防體用相資實爲表裏臣到粵以

來海氛旁午外修戰備內考官常董戒兼施甘爲怨府  
疊次瀝陳論奏分別舉劾久在聖鑒之中無如習氣既  
深指臂殊少僅竭一人之精神才力欲以句稽眾局廉  
察通省勢有不能夫承流分職司道之任曾經奏請嚴  
飭通省文武大員司道提鎮精白乃心同任勞怨復經  
先後會同撫臣奏調在籍道員李興銳前河東道黃照  
臨無非以該二員廉樸勁直正可藥粵省之弊李興銳  
兼長於工政黃照臨又究心洋防冀以風茲敝俗分理  
艱鉅嗣因李興銳已引見未邀允准黃照臨經吏部以  
終養人員向無奏調成案議駁目前自沈鎔經任藩司

後官場風氣漸變新授臬司于蔭霖治行端篤知之有素不日來粵以後政事財用自當漸有起色惟是海防百端正宜及時開辦粵省如善後營務釐金海防捐軍械船雷製造各局皆須專員綜理條緒甚多規模甚廣無時不關涉外洋無事非出納鉅款廣東候補道雖有十數員能辦事者不過兩三人餘皆或近庸陋或近油滑盡効似覺太苛然斷難委以要政且治兵考工尤非專門不辦仍須多有賢員協助現任司道爲之始克有濟合無仰懇天恩飭令李興銳俟勘界事竣仍赴粵東差委至黃照臨一員湘粵接壤迎養非難前疏已經陳

明似於陳情本意無所妨礙竊思查成案以爲准駁者  
部臣之職守擇人材而維大局者聖上之權衡可否懇  
頒特旨發往廣東差委儻他日蒙恩簡任粵省一缺此  
尤逾格鴻施粵事之幸非臣下所敢擅請者也伏懇聖  
明俯念整飭海疆必有人才方能措手俾微臣得資襄  
助一洗粵省官場積弊振此清明之正氣以爲安撫之  
本原謹附片披瀝密陳伏祈聖鑒

旨李興銳勘界事畢尙有另行簡用之處黃照臨業經  
部駁現在該省又無軍務所請均毋庸議欽此

各路防營分別裁留摺

光緒十一年九月初四日

竊惟廣東自光緒九年越事萌動卽有防軍至十年夏而海警戒嚴至十一年春而邊防益迫加以遵旨赴援臺閩經營越圻水陸營勇遠徵近募逐漸增加處八面受敵之區不得不作無米爲炊之計本年春季款議略定各省漸可息肩而臺澎之波未平保勝之局未定粵爲越境比鄰南洋外戶仍不能不盛我軍威隱相懾制以杜狡謀迨五月內澎湖肅清防務解嚴自宜亟爲裁軍節餉之計當經臣等體察強弱分別緩急會商尙書臣彭玉麟次第減汰惟撤營過驟易啓戎心游勇太多又虞生事不得不循序相機辦理計數月以來省內省



外防軍署水師提督方耀所部先後裁去六營零二百  
名留省防四營潮防二營署提督鄭紹忠所部先後裁  
去十一營零四百名留省防三營惠防一營北江防勇  
兩營併親軍一百名沙面巡勇二百名署廣州協副將  
鄧安邦所部先後裁去兩營零四百三十名又裁去所  
部東莞團勇六營留省防一營零一百名舊設巡緝兩  
營提督婁雲慶所部在粵續募湘勇兩營提督王永章  
所部續募湘勇兩營總兵劉樹元所部續募湘勇兩營  
先後全裁提督蔡金章所部廣濟軍四營先後全裁提  
督楊安典所部礮隊裁一營留一營仍分爲兩底營總

兵李先義所部廣勝軍裁去一營留四營提督吳宏洛  
武毅軍五營除先遣赴臺一營外裁三營留一營歸入  
粵省廣勝軍總兵劉寶春所部護雷洋舢板水勇四百  
五十四名知縣張義澍所帶水勇一百名全裁總兵黃  
廷彪親軍一百名全裁署順德協副將利輝所部裁去  
二營并裁紅單船十號留陸營一營赤溪協副將吳迪  
文所部一營及親軍三十名全裁并裁紅單船十號水  
師遊擊黃增勝所部兩營先後全裁水師遊擊黃廷耀  
所部裁去一營零五十名并裁紅單船十號留礮勇一  
百名副將黃德耀所部一營全裁香山縣知縣蕭丙堃

所部招安義勇裁去七十二名留二百名署大鵬協副將賴鎮邊所部一營裁去四百名留一百名督標親軍裁去四百名留一百名營務處親兵一百名全裁其副將龔尙春援臺淮軍一營裁留應由福建撫臣劉銘傳酌辦此外尙有副將黃榮華所部新設內河舢板廣安水軍三營副將黃金福所部舊設綏靖營巡勇一營均仍其舊此省防裁留之軍也高州鎮所部分防廉欽共四營全裁現委王孝祺署該鎮卽以所部勤軍現存四底營填紮欽州署參將莫善喜新舊四營全裁參將陳榮輝所部兩營先後兩次全裁卽以馮子材所部現存

六底營填紮由閩赴廉之遊擊方沿所部五營載回潮州全裁選其精銳併入潮防老營此廉防裁留之軍也瓊州鎮所部兩營裁一營留一營雷瓊道王之春所部粵軍五營零二百五十名今裁三營零二百五十名留兩營都司鄭廷宗所部水勇八百名紅單船二十號全裁此瓊防裁留之軍也潮防原有之營先後裁去方文方鼐等營共一千二百名留二營歸入方耀所部六營計算惠州歸善縣自十年稔山會匪滋事後該縣募勇三百名全裁計惠留鄭部一營潮留方部兩營此潮防惠防裁留之軍也出關會滇會桂征軍提督馮子材所

部先後裁去十五營留三營仍分爲六底營并親軍一百名以前分屯龍州上思州欽州廉州今桂軍已數防守擬將屯龍之營撤回右江鎮總兵王孝祺所部先後裁去六營留兩營仍分爲四底營并親軍一百名屯廉州北海底營者每營按正營人數減半惟營哨官尙存各營名目意在減勇數以節餉項存營底以壯聲威一旦有事熟手將弁具在軍裝器械皆全即可募足全營尙不爲難唐景崧十營先後裁去九營留一營仍分爲兩底營并親軍一百名屯龍州西下凍土州其黃守忠兩營本爲安插遠人附屬唐軍勢難遣撤應另行籌酌

奏明辦理尙仍其舊西江襲邕潯梧一帶轉運船水軍  
五百五十五名全裁其劉永福一軍原擬五營應俟抵  
粵後實有幾營再行酌定奏辦此出關征剿凱旋分防  
裁留之軍也統計各路裁撤水陸勇丁五萬三千八百  
餘人每月可省餉二十餘萬計現存者廣境桂境共尙  
有四十餘營無可再減所有已裁各營均經分別道路  
遠近酌給資糧籍隸外省者或以輪船送至上海揚州  
或雇民船送出粵省北界由江西湖南分遣量其餘資  
可抵湘鄂江皖直東各原籍以免逗留滋事或已據報  
裁竣或正檄行遵辦一切俱屬安謐此外無著游勇甚

多亦經分起隨時資遣惟是海警雖息海防難弛已成之臺壘不能不守新置之礮械不可不練健將勁卒不可不儲養以備緩急粵省水陸盜匪時常竊發不能不借兵力以資巡緝所有原防地段或分營移紮或併力扼要仍責令隨時訓練以紓餉力而期持久  
旨該部知道欽此

查明洋款數目請飭各省關分還摺

光緒十一年九月初四日

竊臣於光緒十一年五月初七日承准總理各國事務衙門來電本日奉旨廣東所借洋款除動用外餘存若干著張之洞迅速詳晰奏報候旨撥用欽此臣當卽飭

行司局查覆去後茲據布政使沈鎔經會同善後海防局司道詳稱廣東省第一次借匯豐洋行銀一百萬兩係爲本省海防之用第二次借匯豐銀一百萬兩原係備購鐵艦旋以海防無款改作防費均係前督臣張樹聲奏明辦理次第支放臣於上年秋間查明前款已竭防急費重奏准向匯豐第三次借銀一百萬兩應用又於十二月間以粵餉不繼奏准向匯豐第四次再借五十萬五千鎊按照外洋時價每鎊值銀三兩九錢八分五釐一毫四絲九忽零合銀二百一萬二千五百兩二錢九分三釐統計本省海防案內所借洋款共銀五百



一萬二千五百兩二錢九分三釐聲明粵借粵還不累  
各省各關計自上年夏間至本年春杪省防緊急水陸  
戒嚴瓊海常見敵船廉口復經封堵所有支發防餉建  
築礮臺購買華洋軍火船隻裝械以及一切布置河道  
守具轉運製造在在均需鉅款前項借款計已支用無  
餘此粵省海防案內歷借洋款收支之實數也此外粵  
省代借寶源洋行一百萬兩又第五次與匯豐洋行議  
借七十五萬鎊按照每鎊價銀三兩九錢八分五釐一  
毫四絲九忽零合銀二百九十八萬八千八百六十一  
兩八錢二分二釐以上代借各案洋款共銀三百九十

八萬八千餘兩均經臣先後由電奏准其寶源一百萬兩係奏明分撥滇桂餉各四十萬兩劉永福餉二十萬兩匯豐借款七十五萬兩內係奏明援臺規越共一百萬兩臺越各半支用又奏明籌備鮑超軍餉一百萬兩先准部行以鮑餉由川省支應此項另款存儲嗣以滇桂邊防餉絀續經節次奏明改解滇桂各四十萬兩鮑餉十萬兩桂省邊防購礮十萬兩又奏明定購氣礮一百萬兩均經聲明由各省關認還先後奉旨允准在案因洋行以鎊數合計除上兩項二百萬兩外實存九十八萬八千八百六十一兩八錢二分二釐此粵省代借

洋款收支現存之實數也以上等由由該司局核明詳請覆奏前來伏查粵省代借各案洋款共銀三百九十八萬八千八百六十一兩八錢二分二釐係奏准由各省關合力籌還之款所有歷次合同亦經分案咨送戶部計應還本息轉瞬屆期應請旨敕催部臣查明歷次合同內載應還本息日期銀數作速指定各省關分還數目行令遵照撥解咨粵查照並請嚴定撥解遲延處分以免臨期貽誤大率粵省所借洋款先後共九百萬兩零爲本省海防而借者約五百萬兩爲滇桂臺越各省買礮而借者約四百萬兩本省借者經前督臣張樹

聲借二百萬臣借三百萬俱已收清支訖此應粵省藩  
運兩庫歸還外省借者已用者三百萬現存候撥者約  
一百萬此應各省關歸還爲滇桂用者似應由向有滇  
桂協餉省分認還應候部臣酌派伏思粵省爲三洋之  
首衝越寇之接境本應各省合力通籌以顧前敵祇以  
海疆同時設防腹省各有協款計臣撥派已費籌維當  
時艱事急之時臣誠不敢以無餉藉口貽誤邊疆更不  
忍以煩數請撥上勞宵旰是以將本省海防五百萬兩  
聲明粵用粵還獨肩其難獨任其累區區苦衷愚悃當  
在 皇太后 皇上天鑒之中將來悉索抵支能否如

期照付實已不易周轉至於代借約四百萬兩專爲維持全局協濟鄰封合無仰懇天恩敕部於分派各省關案內粵省邀免再派以免失期洋賈偏累巖疆粵省幸甚

旨戶部速議具奏欽此

張文襄公全集卷十二終

崇仁黃維翰校